

## Morning Regional Dogri News Bulletin

09<sup>th</sup> Feb, 2025 09-20 Hrs

### Headlines

- केन्द्री राज्यमंत्री डाक्टर जीतेन्द्र सिंह ते जल शक्ति मंत्री जावेद राणा होरें कठुआ च पानी सप्लाई सरबन्धी केन्द्री योजनाएं गी शुरु करोआया ते 100 फीसद योग्य लाभार्थिएं गी इंदे दायरे हेठ आहने लेई आखेआ ऐ।
- मंत्री सकीना इत्तू होरें नमीं दिल्ली च प्रधानमंत्री अनुसूचित जाति अभ्युदय योजना आहली बैठका च हिस्सा लैता ते जम्मू-कश्मीर च पट्टी दर्ज जातिएं दे सशक्तिकरण च हासल प्रगति पर लोऽ पाई।
- मुख्य सचिव होरें 'प्रशाद' योजना तैहत सैलसफा सरबन्धी ढांचे दे विकास दा जायजा लैता ते परियोजनाएं गी बेल्ले सिर सबूरा करने दे निर्देश जारी कीते।
- फौज नै रजौरी जिले च कब्जा रेखा पर घुसपैठ दी इक बड्डी कोशश गी नाकाम करी दित्ता ऐ।

<><><><><><>

### Kathua WSS

ग्रामीण इलाके च पानी सप्लाई गी बेहतर करने दे मकसद कन्नै केन्द्रीय राज्यमंत्री डॉ. जितेन्द्र सिंह ते प्रदेश दे जल शक्ति मैहकमे दे मं?र जावेद अहमद राणा होरें जल जीवन मिशन तैहत जसरोटा कठुआ च 7 केन्द्रिय पानी सप्लाई स्कीमें दा उद्घाटन कीता। उनें सब्बने तगर एहदे लाह पजाने लेई जोर पाया। 25 करोड़ रपे दी लागत आले इस जतन तैहत 12 ग्राएं दे 15 ज्हार 8 सौ थमां बद्ध लोकें ते 2 ज्हार 584 घरें गी पीने आला साफ पानी उपलब्ध होग। इस स्कीम च ट्यूबवेल, बोर वेल, पानी दे ओवरहैड, टैंक दा निर्माण शामिल ऐ। इस मौके पर बोलदे होई केन्द्रीय राज्यमंत्री डॉ. जितेन्द्र सिंह होरें आखेआ

इस जतन दी मीत्ता गी उजागर करदे होई जल शक्ति मंत्री जावेद अहमद राणा होरें आखेआ

<><><><><><>

### Sakina PM-Ajay(byte)

गरीब ते दबोए-लतड़ोए दे समुदायें गी सैह्योग देने दी इक महत्वपूर्ण गैह दे तैहत शिक्षा, सेहत ते उच्च शिक्षा मैहकमें दिएं मंत्री सकीना इत्तू होरें कल दिल्ली च केन्द्री सलाहकार कमेटी दी इक उच्ची-सतह दी बैठका च हिस्सा लैता। बैठक दरान प्रधानमंत्री अनुसूचित जाति अभ्युदय योजना बारै मुख्य करी ध्यान केन्द्रित कीता गेआ

ते इस मौके उपपर सेहत सरबन्धी योजनाएं, समाज कल्याण सरबन्धी पैहलकदमिएं ते शिक्षा सरबन्धी सुधारें बारे मुख्त तौर उपपर चर्चा कीती गई। केन्द्री मंत्री डाक्टर वीरेन्द्र कुमार होरें इस बैठक दी प्रधानता कीती ते इस दरान प्रधानमंत्री अनुसूचित जाति अभ्युदय योजना दे कम्में च हासल प्रगति दी समीक्षा कीती गई। जम्मू—कश्मीर च इस योजना दे महत्वपूर्ण प्रभाऽ उपपर लोऽ पांदे होई मंत्री सकीना इत्तू होरें आखेआ

<><><><><><>

## CS-PRASHAD

धार्मिक सैलसफा ते ढांचा गी बढ़ावा देने दे मकसद कन्नै मुख्त सचिव अटल डुल्लू होरें सैलसफामैहकमे दी इक बैठक लाइयै PRASHAD स्कीम तैहत जारी प्रोजेक्टें दी प्रगति दा जायजा लैता। बैठक च महाशिवरात्रि उत्सव गी दिक्खदे होई शिव खोड़ी श्राईन च तैआरिएं पर बी चर्चा कीती गई। डुल्लू होरें प्रोजेक्टें गी समें सिर पूरा करने पर जोर पाया तां जे ओने आले श्रद्धालुएं गी बेहतर सुविधा थोई सकै ते कटरा, उत्तर वैहिणी ते पुरमंडल दा विकास होई सकै। उनें सैलसफा ते सांस्कृतिक मैहकमे गी हिदायत कीती जे ओह कम्म करदे बेल्लै मकामी कला ते वास्तुशिल्प दे संरक्षण प्रति ध्यान रखन। उनें शिव खोड़ी श्राईन थाहर ढांचागत सहूलतें गी बधाने सनें सुरक्षा दे पुख्ता बंदोबस्तें पर जोर पाया। इनें कम्में गी ओंदे उत्सव दे चलदे पैहल दी बिनाह पर करने लेई आखेआ।

<><><><><><>

## Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबन्धत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर—अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उपपर 15 फरवरी 2025 थवां पैहले—पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>

## Infiltration

राजौरी जिले आली कब्जा रेखा कन्नै लगदे कैरी सेक्टर च सेना नै घुसपैठ दी इक कोशश गी नाकाम बनाया ऐ। आकाशवाणी जम्मू संवाददाता दी रिपोर्ट मूजब घुसपैठ दी कोशश गी नाकाम करने मगरा सेना आस्सेआ इलाके च व्यापक तपाशी अभियान चलाया गेआ तां जे आतंकवादिएं गी फगड़ेआ जाई सकै। सेना दे गश्ती दल पर कब्जा रेखा कश गोलीबारी होई जेहदा बलें आस्सेआ बनकदा परता दित्ता गेआ। बादू बलें दी तैनाती कीती गई ते इलाके दी सख्त निगरानी कीती जा'रदी ऐ। तपाशी अभियान दरान ताजा गोलीबारी दी कोई जानकारी नेई ऐ। सेना आस्सेआ घुसपैठ गी रोकने लेई सरबंधी तंत्र गी मजबूत कीता गेआ ऐ। होर ब्यौरे गी अजें बलगेआ जा'रदा ऐ।

<><><><><><><>

### Agriculture Ramban (byte)

राई-बाई सरबंधी कम्में गी बढ़ावा देने दी इक महत्वपूर्ण पैहल दे तैहत रामबन दा कृषि विभाग राई-बाई कन्नै जुड़े दे उद्यमिएं गी अज्जै-कल्लै दिएं तकनीकें ते ढंग-सरिस्तें बारै मदाद उपलब्ध करोआने गितै अनथक जतन करै करदा ऐ। मजूदा समें च रामबन जिले च खुबें दी काश्त सदा कोला मती होआ करदी ऐ ते एहदे लेई मैहकमे आसेआ हर चाल्ली दा मार्गदर्शन ते मदाद उपलब्ध करोआई जा करदी ऐ जेहदी मुकामी करसानें बड़ी मती सराहना कीती ऐ। जिले च खुबें दी काश्त लेई साजगार म्हाँल उपलब्ध होने दे चलदे प्रशासन नै एह लक्ष्य मित्थेआ ऐ जे ओह एहदे राहें करसानें गी औंदी दा इक बादू जरिया हासल करोआग ते कन्नै इस गल्लै गी बी पक्का करोग जे उंदी मेहनत दे उनें'गी खरे माली नतीजे हासल होन। इस सरबंधै च आकाशवाणी खबरें कन्नै गल्लबात करदे होई रामबन दे जिला कृषि अधिकारी रवि शर्मा होरें आखेआ

<><><><><><><>

### Water Conservation Rally(byte)

जल संरक्षण आस्तै जागरूकता बधाने लेई "हमारी दुनिया" कार्यक्रम दे तैहत स्कूल शिक्षा निदेशालय जम्मू ते प्रथम एजुकेशन फाउंडेशन नै उधमपुर च इक रैली दा आयोजन कीता। सरकारी सिटी मॉडल स्कूल उधमपुर दे छात्रें इस रैली च हिस्सा लैता। रैली दरान छात्रें जल संरक्षण आले संदेश तख्तिएं पर लिखियै लोकें गी जागरूक करने दा प्रयास कीता। आकाशवाणी समाचार कन्नै गल्ल करदे होई प्रथम एजुकेशन फाउंडेशन दे इंचार्ज संजय भट्ट होरें आखेआ

<><><><><><><>

### Weather

मौसम विभाग नै अज्जै थमां अगले त्रऊं दिनें दरान जम्मू ते कश्मीर च हल्की बरखा ते बर्फबारी होने दी पेशगोई कीती ऐ। टामी-टामी थाहरें पर अज्ज हल्की बरखा ते बर्फबारी होइ सकदी ऐ। 10 ते 11 फरवरी गी

मौसम खास तौर पर घाटी च मता सक्रिय होग। 12 थमां 14 फरवरी बश्कार मौसम खुश्क रौह्ग ते 15 ते 16 फरवरी गी मौसम बदलोखडा रौह्ग ते हल्की बरखा ते बर्फबारी दी बी मेद ऐ। जम्मू कश्मीर च इस बारी बरखा घट्ट होई ऐ। आंकड़े मूजब पैहली जनवरी थमां 29 जनवरी बश्कार बरखा च 87 फीसद कमी दर्ज कीती गई।

<><><><><><>